



KNP VAIHAWM KIKHAWP 10-VEINA | D. KHAWZIM KOCHUAM BIAK IN



MISSIONARY SAWLDARNA KIKHAWP | HILL-TOWN KOCHUAM BIAK IN



THANGKAI & LUNGP AU STATUE, CHIANGPI



COMMEMORATIVE PLAQUE, KANGVAI

To.

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



ESTD. MARCH 2008
APRIL 2026

Monthly Christian Magazine **Hinna Vâk**

AN ORGAN OF THE TANGPHAI PRESBYTERIAN CHURCH



Insung ah Nute mawpuakna

- CHANTAWK AH LUNGAWI
- KHANGLAITE LEH KISÛMTHEINA
- PATHIAN ÂNG AH PAWMTÂK HINKHUA



EDITORIAL | SERMON | KOCHUAM HUANG | REPORTS | SÛNNA ETC.

Editor : Rev. Kamkhotinthang Neihzial,
Executive Secretary

Joint Editors : Rev. C. Lalremruata, Consultant
: Rev. Luttinlel
: Rev. Khaisonhang Vaiphei
: Upa Thualkholian
: Upa Nengsuanhang
: Pi Neikhovak, General Secretary, CKNP
: T.Upa Thangginlun, General Secretary, CKKP

Business Manager : Tual Upa Langlalthamuan
TPC Office D. Phailian
P.O. Box 107 Churachandpur-795128
Phone No. +91 9958160325
Email - ehinnavak@gmail.com

Kum khat lak man : Rs. 150.00

A man penuam leh a la thak nuamte'n Business Manager kiang ah hiatsak di.

A SUNG AH THU UMTE

1. Editorial	01
2. Kochuam Huang	02
3. Chantawk ah lungawi	03
4. Hinkhua Tuiluang gual	05
5. Khanglaite leh Kisumtheina	11
6. Kiningting	14
7. Insung ah Nute mawpuakna	18
8. Pathian ang ah pawmtak hinkhua	22
9. Chawihawina sâng	24
10. Samari mipha tekthinthu	26
11. India Mal-sua politics kisang leh khristiante	29
12. KNP & KKP huang	38

SYNOD PUIPATE

Moderator	:	Rev. S Lama Vaiphei
Secretaries	:	Rev. Summinlian Vaiphei (Sr.) Rev. Lalpiaklian (Jr.)
Finance Officer	:	Upa Tinliankham
Statistician	:	Rev. Andrew LR Khiangte
Executive Secretary	:	Rev. Kamkhotinthang Neihzial
Consultant	:	Rev. C. Lalremruata

Hinna Vâk ah thu kisuate zosia hi Editor ngaidan a hi vek puai



Pauchapna Thupi:

1. Karbi Anglong Misson Field ah semtu thak mi pathumte a ding in pauchap hitiu.
2. Pastor Bial Kikhawmpi Thagau lam malzawlina tawh buaina umlo ah i mat chiat theina ding un dawn hitiu.
3. Kochuam in maban ah Programme tamtak i neiteu hi buaina bangma umlo ah, Taksa leh Thagau ah lawting tak ah mat a hi theina ding in dawn hitiu.
4. I Nam puitute (VPC, YVA, Zillai, VWA) â ding in pauchap hitiu.
5. Gamsung buaina ziaak ah panlatu pawl chuam chuam ah puitute â ding in pauchap hitiu.

Karbi Anglong Mission Field ah Missionary pathum sawlbete



NISÎN AH VUIMANG DI I NEI U'I

Hinna Vâk Simtu dawitak, dawisakna Chibai ka hun lân hi.

Mihing chu a thi takleh mihing taksa pangai a put taklo ziaik in muatmang ta mai di leh zia khawvel ah kimukit talo ding in vuimang sek a hi. Thi thei di leh vuimang thei ding ah um hi malzawlina a hi. Gingtuten thina khêl ah chanpha i chanzawkna ding ua Jesu kha vuimang a hi ti hemil pua'itiu.

Khrista vui ah a um hi Bible ah thu kigen leh Khrista kamsuakte sukbukimna a hia (Is 53:9), a thi puai ti ginlelna chu a suhbei hi. Khrista vui ah a um hin Khrista thina ziaik in i gitloteu ngaidam a hi theina ding ah a kipiakna leh Pathian tawh i kizawpmat kit theina lampi ei siampiakdan kichian tak in mu thei a hi.

Khrista vui ah a um hin i gitlona zosia Pathian mitmu ngei in lakmang a hi tai ti ei hilchian a hi. Ei uh le Ama gual ngei ah thi di, vui hi di, thagau taksa tawh thokit ngei di i hui. Ankam muchang gual in hung sel thak di, muat thei ah kipat muat theilo in. Pathian thilhitheina ziaik in. Khrista a thi kha thil makmaw, a lo theilo a hi.

Jesu chu Bu changkhat ketha, a thi, ga tam tak a sua gual hi a hi (Joh 12:24). Zia gual chun, Jesu nungzui 12 te le a hui ah, ei uh le zia gual ah chun i um guat chiat diu a hi. Zia hin martyr ah thi vek di a genna chu a hi puai. Maleh, Pathian kona vang a kibang suak kêl puai. Taksa ah thi khel khel di a tina vang ei puai. Nisin hinkhua ah hin thiپی di vang i nei ui ti hemil puaitiu. Thaichi i tû a, a thi zetlo chun a thak a kedaw theilo gual in, nisin ah hin thiپی di i nei zing u'i. Sual thilhitheina leh thina ah kipat i zalen tak ziaik un.

I nunlui sual phalo thiپی ah, hin thak ah hin di ei tina a hi. A chutilo chun Khrista â di'n ga sua thei pua'itiu (Mar 8:34-35; Rom 6:2-6), Khrista'n zia khawvel nawpsakna/ khawvel thil/a lopina leh taksa utna zosiate nungngat san ding in ei kona a hi. Ama dawidan ah hing zaw ding in, khawvel thilte thiپی ding in ei dawi hi. Thina ziaik in Hin Thak a um thei bep a hi. Jesu kha hinna thak ah thawkitna ding in vui ah a um gual in ei uh le i thi zet lo chun hin thak hinkhua chang theilo di i hui. Gingtu hin nisîn hinkhua ah vuimang (thiپی) di tam tak i neiteu hi vuimang zing hitiu. Hinna Vâk simtute Lalpa'n hun malzawl chiat ta hen!



Kochuam Huang

Missionary Orientation leh Sawldaw Programme

Missionary pathum sawlbe dite Residential Orientation chu ni 18-20 March, 2026 sung in Tangphai Provisional Office ah neipi a hui ah. Chuleh, Residential Missionary Sawldaw Programme hi Ni 22 March, 2026 (Pathianni) in Hill-Town Kochuam Biak In ah nei a hi.

Sister Synod ah palaite

Synod 3 veina 2025 in 2026 CHT Synod ah palai ding ah a guat Rev. Kamkhotinthang Neihsial chu KKP General conference tawh a kituak ziak in a thasang in Rev. Lalpiaklian tawh Upa Kaiminthang te a chia ua, damtak in a hung tung kit ui. Chuleh, 2026 Karbi Anglong Presbyterian Church Synod ah palai ding ah guat Rev. Vanlalchhuanga leh Upa Lamnek te le a chia ua, damtak in a hung tung kit thei ui.

Revival Speaker-te programme

Khawpi sung ah Revival Speaker-te program chu buaina umlo in a chiatha zawm zing thei ah,

Kochuam-te'n i phatchuampi theina ding un pauchapna'n delzui hitiu.

Synod Office resize

Office resize leh renovate kibawl zinglai a hi ziak in duthusam gual tak ah office staff te'n le na a sem thei pua, kingaithiam hitiu. Tuhin chu a pangai gual in a chiatha thei kit tai.

Office staff Social work

Office malakna'n Chiangpi ah Thangkai leh Lungpau statue umna siamphat leh sukthian a hia, chuleh Mizoram Synod ah lawplutna suangdaw, Kangvai ah um chu siamphat leh sukthianna nei a hi.

KKP General Conference

KKP General Conference 14-veina chu March 5-8, 2026 sung in D. Phailian Pastor Bial zintunna'n Vaiguan gualtak in Vaihawmna, Kitêlna leh Biakna kikhawpte'n navâk tak ah matzaw a hi.

KNP Vaihawm Kikhawp

KNP Vaihawm kikhawp 10 veina ni 27 February - 1 March 2026 sung ah D. Khawzim bial in D. Khawzim Kochuam ah a zintun chu lawting tak ah hun mat zaw a hi.

CHANTAWK AH LUNGAWI

(Habakkuk 3:17-18)

Rev. Luttinlel

"Theichang kung selthaklo in , Olive thingten gâ sualo in, lolai ah bu pianglo in, gan-gualte chule a huang ah umtalo in, gan kul ah chun bawngawn pakhat chale umtalo ziang maleh, Lalpa ah chun kipak zing ing ka tin: Ka hukdamna Pathian ah chun kipak zing ing ka."

Habakkuk thugen hun a hin, Babylon lenggam thuneina leh Pathian mite thagaulam leh khawtang hinkhua a kiakniam ma ma hun (605 B.C) vêl ah zik a hia, Babylon lenggam ah nêk leh dawn ah taksapna liantak a tuak dân uh zawlnei hun ah a lah zik a hi.

1. Bangziak a lungawina pawimaw a h'em?

Thuthunglui hunlai apat hin Pathian mite chung ah haksatnate a tung zing a hi, tu hun tiang a hinle, gamsung ah kial a tung ah, kidonate a um sek ziak in Israel chate'n kiakniamna leh Pathian chung a phunnawina tamtak a tuak sek a hi. I Pathian thu i gen gual un, thâigâte, lolai a bu leh bâl piang talo leh gan-chate a huang a umtalo a hi ziak in, Pathian chate chu a lung-awi uh a pawimaw ziak in, zia thu pawimaw tak, lung-awi ding,

kipak didan hi zawlnei hin mite hiat ding in a lah gen a hi.

2. Bangtik hun ah lung-awi di

Mihiam hih i lawting hun a lungawi hi chu thudik umsa a hi. Lawsap hun a le lung-awi tak ah um theina hi chu ei uh gingtute um didan chu a hi. A khutileh kipak hun hi'n lawsap hun hileh, hun zosia ah lungawi di chu a hi. gingu i hi'nau a Pathian dawidan i sukpitinna ding ua pawimaw khat chu lungawina hih a hi. Phunchiakna, lung-awi theilona in khawtang leh kochuam a subuai in haksatna

a tun thei sek a hi. Zia ziaak chun i hinkhua pumpi ah hin a hunbi um chuamlo ah, a sôn a zân ah lung-awi tak a um di chu i mawpuaknau a hi. I hun neiteu a hin lungawina di ngaitua in Satan tawh kido i hiu hemillo in pan lah leu hin, a hun inle a hunlo in le tigual a khan, damsung hun chawmcha hih lung-awi tak in mangzo thei di i hiu.

3. Lungawina bukim

Hansedawng khawvel a um i hiu a, i hung piandaw a kipat haksatna, kâna tawh piang i hiu a, lungawilo sa piang le a ti thei hi. Ei uh gingtute i hiu leh chu, Pathian thu i mu gual un ka hukdamna Pathian a chun kipak zing ing ka Hab 3:18(b) a ti. Khawvel a lungaina leh kipakna ei piak theite chu, sum leh pai, Hausatna leh gual chung chuanga kâisânnate hih a hi. Himaleh, hun sawtlo kâl in a bei thei sek a hi. "Genthei dân ka thiam tai, hausat dân ka thiam tai, Lungawi zêl ka thiam tai" a tigual ahin, Lal Jesu neitu chun lungawina bukim a nei tai. Khrista ah lungawina chun thildang in ei

su buai zolo di a hi. Khawvel in ei sukbuai zing nâklai i hiu chun, lungawina bukim nei nailo ti di a hi.

Thukhakna

Habakkuk hunlai in Karkhemish ah kidona (605 BC) vêl in a um a, Babylon lenggam a haksatna leh kiakniamna nasatak a um lai in zia thu hi zik a hi. Tulai ah hin kidona leh kithâtuaana tamtak a um hi. Ei uh le lungawilonate i nei ziaak un kiphinna, kihuatna a hung piang sek a hi. Zawlnai hi ziang maleh lungawilona a nei hi. Pathian kiang a lungawina leh panpina dawn in a pauchap a hi. Sum leh pai khawlkhawmte lawsam di a hi dan uh a gen a hi. Tuhun a hin ei haw hile lungawilona di hawl in hun i mang sek uh a hi. Zia khawvel a i um sung ua hin chu lungawina bukim chu umlo di a hi. Ahinlah, Lalpa Jesu zâl in lungawina bukim leh kipakna bukim chu nei ngei di a hi. Lungawi zêl ka chîngtai, Lungawi zêl ka chîngtai, ei zilsaktu Lal Jesu ama ngei a hi ngal ah.

HINKHUA TUILUANG GUAL

~ Rev. Thangkhohen
Gangpimual

Pathian in siamtîl ah thil a siam lai khan thil zosia hi umzia nei leh panmun nei chiat ding in a lah siam ah, panna bei ding in bangma a siampuai. Pathian thilsiam hi pawl lian tak pani (2) “Hinna nei” leh “Hinna neilo” in a khenthei hi. Pathian in thil zosia hi lopi tak ah a siam vek a hi. Ahinlah, lopi chungnung diak ah a siam a um hi. Zia chu mihiam a siam ah “Hinna” a piak a hi. thildang zosia chu um hen a tia um ziang a hia. Hinlah, mihingte hi ama khut ngei ah dawî bang tak in a siam ah a hinna hu a pia a hi. Mihiamte hinkhua hi thilsiam dang zosia chung ah thâ nei ding ah Pathian in a siam a hi (Thl 1: 26). Hinkhua hi thil chuam chuam tawh tekhin a lah hi sek hi. Tuhin le hinkhua hi tuiluang tawh vak tekhin leu hin i nuam uh a hi. Zia ma chun hinkhua hung kipatdan, a luldan leh a tawp kit mai didan i Pathian thu'n banggual in a gen em ti hi vak en masa leu hin.

Hinkhua hung umdan Pathian thu a

Hinna/Hinkhua hi Pathian a kipat a hia, man lul tak a siam a hia, himaleh a hun sung hi sawtlo châ a hi. Ahinlah, siamtu'n a siamdan hi vak gêl leu chun, mihingte ei siam dan hi lopitak a hi. A thilsiam dang zosia chu um hen a tia um ziang a hi. Ahinlah mihingte a siam ah chun,

tung man a mêk a, a dawidan tak in a siam ah a lung a tung ah, ziaphat a chun a hinna hû a thâkhum a mihing i hung hi bep uh a hi. zia hinna hu ei piak thagau hi a lopi ma ma a hi. Zia hin hêtna chi ngâ (5 senses) ei pia a hi. Mit ah mu theina, bil ah het theina, nâk a gim hetttheina, vun ah a sat a lum hetttheina leh lei ah a tui a thak a al hetttheina ei pe tel a

hi. Zia bep chu hilo in Eve leh Adam in theigâ a nek ua kipat khan sia leh pha hetna chu i nei tau a hi. Damsung hun hi chawmcha a hi ti hi i het ding uh a hi. I Bible in banggual in a gen em ti hi vak en leu hin. Malai mite chu kum zakua (900) vâl tiang a lah dam thei uh a hi. Methuselah khale kum 969 tiang a dam a hi kha. (Thl 5: 27) ahinlah (sam 90: 10) na chun ka damsung niteu hi kumsawm sagi a hi'n hatna zia in kum sawmgia le a hi thei ah ,ahinlah a sawtna chule gentheina leh lungngaina mai a hi.

(Sam. 39:4-5) na chun Lalpa ka hinkhua a tawp hun di leh ka dengdel zia ei hetsak in a lah tia, chuleh ka hinkhua hi khut phahchan bep in la siam a ti'n a lah gen hi). (Ka hinkhua hi le la mitmuh in bangma kham ei pua, mihingte hi le a hawi leh a hat lai tak un le bangma a hi puau Sam 89:47). (Thugentu 6:12) na chun hinkhua hi limtha hung kilang ah mang kit gual mai a hi dân ei hil kit hi). Jacob chun sôm chawmcha hung kilang ah mang kit gual mai hi a hi

a lah ti a hi (Jacob 4: 14). Job chun ka nite hi a chawmdan chu puangattu khawthei khawliam gualmai hi a hi a lah ti a hi (job 7: 6). Zia zia a chun, hinkhua mantam dan he ah, kingawlsak thei di i hi puau. Nang hinkhua tawbang hi Pathian in kuama a pelo a hi, la hinkhua kha Pathian in nang bep â ding ah lul tak ah a siam a hi.

Hinkhua leh tui luang kibatna

1. A nâknei a hiu

Tuiluang hi a nâk umlo in tui hi a luangtheilo a hi, a nâk umlo a luang chu chawmlo kâl in a kang maisek hi. Tuiluang hi a nâknei in a luan tawpna le a nei in tuisuagiat ah a lunglut sek ui. Ziagual ma chun, hinkhua hi le a neitu, hinkhua nei pa a um hi ti het di a hi. Chuleh hinkhua hi le a tawp hun a um ah, hinkhua a tawp phat leh hinna/hinkhua nei pa kiang ah kile kit di a hi. Zia zia ah chun hinkhua matdan hi chitthei a ngai hi.

2. Haksatna

Tuiluang leh hinkhua hin le haksatna tamtak a tuak gël

gel ui. Tuiluang hi le nawp tak ah luanggual in i ngai maithei a hi. Himaleh zia chu hilo a hi, tuiluang hin le damtak ah a luangtheina ding in hun haksa tamtak a tuak ah, a pal galkâi a gai a hi. Chûklai leh guapi a hung zuk phat leh tui a hung lian in, a lui kam in a dawlo hial in a luanchâng a um sek hi. Chuleh, a luansuk na hin, a lampi ah, suangpi lian tak tak leh a kawina mun ah khobang a sukha sek a hi, hak satak in tal leh kham lak bang in le a luang sek ui. Zia haw zosia chu a hung zaw phat uh leh khâl a hung hi phat leh nuamtak in damdiei in a luang sek uh a hi.

Ziagual ma chun, hinkhua hin le haksatna tamtak i tuak sek uh a hi. Lungngai beidawng châng leh lunggimna leh siatna hun tamtak kituak sek un, hinkhua beidawng a hi um chang i nei sek uh a hi. Maleh tui luanglai chu chawl thei a hilo gual in hinkhua hi le a chawl theilo a hi. Hun nuam i tuakna ding

ah chun hun haksa tamtak chu i pal galkâi uh a ngai a hi. Damlai hinkhua a hin i lampi a suangpi, kham leh tal leh khobang sût chang um maleh tuiluang in le lam dang a haw mai gual in en le hinkhua damna ding ah chun lampi khat a bin leh lamdang khat i hawl a hi haw mai a ngai a hi. Hinkhua mihingte i vangphatnau chu i lungkham haksat niu in le hinkhua nei pa bêl di i nei uh hi a hi. (Mat 11: 28-43) chawldamna di Jesu i lah nei uh hi a hi. Chuleh (1 Peter 5: 8) Pathian in la lunggêl lungkhamna zosia ka chung ah septha'n keima'n la khankhua di ka he nai a ti a hi.

3. Malsawmna

Sam 1:1-6, na ah chun tuiluang leh hinkhua midangte â ding ah malsawmna a hidan kichian tak in i mu a hi. Tuiluang chun hinna tamtak a siam hi, tuiluang kiang ah thing umte chun tui apat in hinna a kilakua, thing le aga a hawi ah, a dua le a vuai ngailo a hi. Chuleh a kîm a kiang

ah ganhing haw'n le a tui chu dawn in a kihin suasek uh a hi. Hinkhua le a pepa dawidan tak ah mangte chu ziagual tuiluang hinna tamtak pe sekigual hi a hui. Hinkhua pepa'n hinkhua a piak hi midangte â ding ah malsawmna hi ding in a daw hi. Pathian in Abraham kiang in "Mal hung sawm ing ka tin, nang midangte â ding in malsawmna hung hi ta'n"(Thl 12:2) a tigual khan nang le midangte, chaga genthei leh thagau lam ah liangvaite â ding ah malsawmna la hi ah, hinna petu la hi a ngai a hi. Zia chu la hilo chun, la hinkhua kha bangma hilo, busi hui in a tawmang gualmai hi di la hi.

4. Masawn zing ding

Tuiluang hi banggual in hun haksa tuak hen la, mun haksa hi lehle kichawl ngailo a hi. Ahinlah, tui hi a luanlo ah, a kiting zing leh a gimsia sek hi. Tui kidîl a luangdawklo hawkhu a gimse sek ah, a tui le a nêktâklo sek ui. Hinkhua hi le taksa leh Thagau ah

masawnlo a hi um chun a thitawh kibang hi di ihui. Gingtute vang chu taksa leh Thagau a masawn zing di i hui. Sawlchak Paul in, (Philipi 3:12-16) na chun haksa maleh, nunglam a thil umte hemil in malam pan ding in ei daw ah, la phak natiang uh chu tudet zing un ei ti a hi. Mizo bible ah chun i phakna tiang ua pat masawn zing ding in ei hil a hi. Gingu khat panna neilo ah la um chun gingu a thi hi di la hi. Chi a alna bei ah mite'n a pai ua a taw den gual bep leh thaumei vâk a thautui bei, vâktheilo gual hi di la hi. (Mat 5: 13-15). Zia zia chun gingu hinna nei la hi chun taksa leh Thagau ah ma la sawn zing di a hi.

5. Kisiamlem thei di

Tuiluang hin bang gual haksatna tuak lehle, a kisiamlem zel sek hi. Alampi ah suang a um ah, a phût thâk zawlo chun, a pêlna di lampi a hawl ah, a luangsun zawm zêl mai a hi. Lui luangkawi in tang a h'em khobang a h'em a sut leh a

kilekit ah, a lemchan na lam lam in a luang maisek a hi. A thil tuak zil in a kisiamlem zêl mai sek a hi. Ziagual ma chun hinkhua hinle haksatna tamtak i tuak di mawng uh a hi. kialpi, gâlpi, natna hileng chuamchuamte hinkhua ah mimal haksatna hita lehle, pêltheilo di leh thawkwawlo di Pathian in ei tuaksaklo a hi. I pêltheilo uh chu thîna bep hi a hi. Zia ziak chun, banggual buaina hung tung lehle hinna siampa leh hinna pepa lam en zing ah, i kisiamphat ua, a hun leh mun zil ah hinkhua hi i siamtuak zêl ding uh a hi. Zia kisiamlem hin i Pathian ginnau hi phatsan di tina hizawlo in, ginum tak ah Pathian thu tawh kituak ah, hinkhua hi khawvel khanto dungzui ah taksa leh Thagau ah khantona tawh kituak ah i um chan uh kisiamtuak mai di tina a hi. Tuikiting a nâk umlo chu a kiam pai sek gual in hinkhua mi tawh kisiamtuak theilo mi tawh kichamtheilo hawn khantona leh masawwna a neitheilo uh a hi.

6. Kilekit theilo

Tui hi bangmatik ah a to lam ah luangngailo a hi. Asuk ah luang hi a luang pai ah tuisuagiat ah a luanglut maisek a hi. A hung luan suk nung chu a to in a luang kit ngailo a hi. Ziagual ma chun, hinkhua hi le hun chiasa chu kokit theilo a hi. Banggual in ngai leu hin le, i hun chiasa chu kokit theilo a hi. Gingtute le khat vei i hung pian zaw ua hin vel pian kit thei talo i hiu. I hun sin, nisin ah i tawpna di lam zuan i hiu ti i kihiat uh a ngai a hi. Zia ziak chun hinkhua hi a lawk thei pen leh a man tamthei pen a hi mat uh a ngai a hi. Mizo lâ siamtu'n, "Aigupta sable ngailo in min hruai ang che" a tigual ah khan hinkhaw lui ngailo ah hinkhua neipa kiang i tunna di lam en zing kawm ah hinkhua hi i mat ding uh a hi. A kikhêl nung ah kisîk hin umzia a neilo a hi.

7. Kiho thei ding

Luicha ah tui luangchun, luilian zaw a zawm ah, luilian chun luipi a zawm kit

ah, a tawp ah tuisuahgiat ah a luanglut sek hi. Ziagual ma chun, hinkhua hi le i hung pian zaw, i naupan lai, pitin hun le hi têt a hi thi hun a um hi. Zia hun sung ah hin hinkhua a hi tuak zosia hi tawh kigawp thiam dan i zil uh a ngai a hi. Luicha'n lui lianzaw a zawm gual hin, gingtute hin le i ginnau hi i suklet ua, i puanbûkteu i kaipal ua i kêklet uh a ngai a hi. I kîm i kiang ua i chenkhawmpiu U leh naute leh nam dangte tawh i kihothei ua cham tak a hi um ua, i hinkhuau a beitiang ah chamna siamtu i hi zing ding uh a ngai hi. "Chamna siamtute chu a vang phau Pathian cha sak ah um di a hui " (Mat 5:9) ti Bible a kimu gual un, mizosia tawh kicham ah i um ua chamna siamtu i hi diu a hi.

Awle, tuiluang leh hinkhua ah kipat in zillai tamlo a chung ah hin i zil tau ah, a tawpna i vak gen nawp uh chu, tuiluang hi a luantawp leh a tawp a hi ziang a hi. Ahinlah,

hinkhua hi vang ziagual chu hilo a hi. Zia lei a hi hinkhua hi a tawp zaw phatleh, hinkhua a thak hung kipan bep di a hia, zia chu leisiat hinkhua gual mai mai ah chawmtalo di a hi. Kumtuang kumtuang ah um di a hi tai. Tuiluang chu tuisiagiat ah a luanglut ah a tawpmai a hi. Tuiluang chu a kipatna khat a tawpna le khat a hi. Ahinlah, hinkhua hi le a tîl ah chun a kipatna khat a tawpna di le khat a hi. Maleh, Adam leh Eve sualna, (Eden natna) ziak ah chun hinkhua hin tawpna di mun ni i nei tau a hi. Ahinlah vangphat um tak in khawvel ah i dam lai ua hin dawitel ding pani i nei u'i. Pakhat chu "Vangam" Pathian, hinna pepa kiang ah kumtuang ah um di leh, a pakhat kit chu "Gawtmun" zia chu kumtuang gawtmun ah um di a hi. Khawizawk hi la têt diam le? Hinkhua chawmcha i nei sung ua hin, hinkhaw thiangtho, Pathian pawmtak ah hinkhua mang chiat thei ding in simtu zosia Pathian in ei malsawm chiat ta hen.

KHANGLAITE LEH KISÛMTHEINA

*Rev. Genlemthang Suantak
i/c Kawlhen Pastor Bial*

Khanglaite leh kisumtheina ti hi thupi pawimaw tak a hia, a thupi pawimaw leh lul gual ah hin chu zikdaw leh gendaw haksa ding a hia, ahinlah tuni ah hin i theidan dan un zia thupi hi point tamlo in genlang ding in kisingsa'i tiu:

1. Khanglai leh Khawvel lam ah lawtinna

Mihingte hi khawvel ah i hung pian ah kipat in kinepna lian tak i pianna nu leh pate'n a nei ui. Zia chu a hileh 'ka chapa/chanu' hi hung khanglian intin, mi lawting ahiloleh mithupi khat hung hi leh ti hi mi nu mi pa-te duthusam a hi. Kuama a chate mi phalo ding ah daw kiumlo a hia, khanglai sung ah mi kisûmthei chu a lawi a gual chung in a leng tei tei ui. Khanglai mi tamtak thiamna ah le kuama englo, pilna lam ah le kuama englo hilehle lawtinna changzo ngailo i hiu em i ti chun mani kisûmzawlo

ziak a hi ut deu hi. Thiam in pil lehin le nêk leh dawn a hilo leh i taksa leh lungthim thunun zawlo a hi chun lawi leh gual kiphazo diaklo a hi. Khanglai sung ah mi chungchuang leh lawtinna changte hi chu mani kithunun zo mi, bang kawng ah mi kisûmtheite a hiu. Sapte thuching khat in 'Survival of the fittest' a tiu hi a pawimaw in a lul kasai, zia thuching apat zillai i lak thei uh chu banglam banglam ah lawtinna chang ding in thil zosia kisûmzawna hi a pawimawpen a hi. Sapte thuching dang khat in "Khanglai lekha thiam leh pilte sang ah khanglai mi

kisûmtheite hin lam bangkim in lawtinna a chang zaw sek ui” ti’n a gen hial uh a hi. Zia zia a chun khawvel lam ah lawtinna ding in le taksa leh lungthim ah kisûmzawna hi a pawimaw pen a hi. Mihing â ding ah chu kithunun hi thil haksapen khat chu a hi. Himaleh, ei hatsaktu Khrista zâl ah chu bangkim zaw thei a lah hia, Pathian muang in kipan thak hitiu.

Thupilte 25:28 “Ama lungthim thunun zolo michu, khawpi kulbang neilo tawh kibang a hi”

2. Thagau lam lawtinna

Pathian in mihingte hi a lim leh mêlpu ei siam a hi ti i hechiat ua, ama gual ah ei siam a hi chun bangkim ah ama i pua diu hileh chu kilawm a hi. I pi leh pu te’n ‘Sakhi chu a pi a san leh a no le a san hi’ ti’n a lah gen sek ua, ahi’n mihingte hin bang zia a ei siamtu Pathian hi khanglai tam tak in pualo i hi diam uh ti hi eima chiat kidawng le hin ut um ka sa a hi. Ganhing thagau neilo i ti in bawn a hingtute gual

gual ah a pian ua a hin thei leh mihingte hi ei siamtu dawigual ah ki-um theilo a hi diam?

Khanglai i hilai hi a lul in a lopi ah, i hatlai a hi zia in banglam banglam ah le i lungtupna lam chu zaw theina kinei a hi. Ahin khanglai mi tamtak ei siamtu i pua theilona zia uh chu i kisumzawlo zia uh a hi. Nêk leh dawn lam ah kisumzawlo zia ahiloleh thatdana suak ah i zam zawlo zia leh a dang dang tampi um in ah, bang ah kisûm zawlo zia ah ei siamtu pa pua zolo i hiu em ti chu eima chiat in kihiat na’itiu. Ahinla tu la dinna la dinmun ah khan la lung a awi na em khanglai? Kienchian in, lam bang hem ah la kisûm zawlo zia mai ah ei siamtu dawilo dan ah um den mai di i hi em? a hi puai, ei siamtu’n ei siam apat kisum zawnate leh lam bangkim ah zawna tawh ei lah siam a hi kha. Khanglaite i thahatlai niu ah hin panla in khang thak hitiu, kuama thagaulam ah hatsa pianglo a hi, eima ma in i kisukhat ngai a hi. Zia zia a chu ding daw

thak in ei siamtu'n thagaulam ah hing zing di leh i khanglai chanpите thagau mangthaite suhat ding leh kaitho thak ding ah ei siam gual in um chiat hitiu. II Timothi 1:7 "Pathian in launa thagau ei pe puan, kithununna thagau ei pe zaw ngal ah"

Danial leh a lawite le a kisûm thei ziak un Lalpa'n a chawisang ah, ahi'n Samson a kisûm zawlo ziak in gâlthe khut ah mualpho tak in a thi a hi kha. Khanglai hi sung hi a lul ah, ahinlah, a hun hi hunchawm cha a hi, khanglai i hi sung sung ah nek leh châk hihenla lam chuam chuam ah kisûmzote ma taksa leh Thagau ah lawtinna changte a hiu. Tuni ah hin nang in bang kawng la têt diam, kisumzawna lampi la zawt diam a hilo leh kisûm zawlona lampi la zawt diam, kisûm

zawlona lampi chu thatdana, mi phâk zawlona, a tawpna chu thîna leh manthaina a hi ngal ah. Kisûmzawna lampi chu hak maleh a tawpna chu limna, kipakna, ziate sang ah lopi zaw chu ei siamtu kipakna chang di i hiu. A tawpna ding in ka neu apat ka Bible chang dawî ma ma tuni tiang ah ei suhhattu khat a hileh, I Korinth 9:27 "Ka taksa ka sawizawi in ka thunun sek hi" i Bible masau a khan hitia hin a ki zik ah "Ka taksa hi ka nek vak vak in ka thunun sek hi", khanglai i hi sung ah hin kisûmna di lampi a tam ah, ahin zia Bible chang hi hatlo ni leh basap ni ah ei tîlkhotu leh ei suhhattu in mang hitiu. Khanglaite haw Pathian in a dawidan ah hing ding in Thagau in ei suhhat chiat ta hen.

Aw Pathian, Ka lunggil uh hi nang â ding ah siam a hi ziak in, Nangma ah kipat chawldamna a mu masia a chawlnga tak tak thei puai. Nang â ding ah la siam a hi ngâl ah, la kiang a hung puitunglo ngal chun, bangma'n lungkimna bukim a tun thei puai.

~ St. Augustine

KININGTING

(1 Th 4:11-12)

~ Rev. Lalgoulian
i/c Phaipheng Pastor Bial

Kiningting tak ah hinkhua mat di chu mi zosia duthusam hi ding in ginchat a um hi. Tulai khawvel a hin 'kiningting tak ah hinkhua mang ka hi' ti di hi mi tawmcha bep himaithei in a. Sum leh pai tamtak neite'n le kiningting tak ah hinkhua ka mang hi ti diaklo maithei a hiu. Du-amna khawvel a hin kiningting hinkhua hi haksa tak in kilang maithei a hia, himaleh, gingtute hinkhua chu Pathian zal ah kiningting hinkhua mat thei a hi. Sum leh pai tampi nei ziak a hem, In leh lo tampi nei ziak ah kiningting ziang di tina a hi pua, ahinla eima khamtawk ah hinkhua kiningting ah mat didan vak gen hitiu.

1. Taima tak ah sep di

Pathian in khawvel a siam ah chun mihingte kiang in khawvel ah thil um zosiate hi a etkaw! ding uh leh amau mamawna a mat thei dingun a pia a hi (Thl 1:28; Sam 115:16). Khawvel ah nek leh chak leh sum leh pai hawl na a hin vangphat dan chuam chuam um maleh taima tak ah semte chu a tasam ngai puau. Paul chun "thip hiau ah,

nangmau na chiat ngaikhawk ah, thu ka hun piak gual ua, la khut ua sep la guatna ding un, chutichun, pawlam ah mite mu in melpha'n la tiu in, bangma le tasam pua'n lau" (1 Th 4:11-12) ti'n a gen hi. Taima tak ah semte chu kiningting ding ah Pathian in a guatsa a hi.

Zillaite'n le taima tak ah lekha a sim ua chun a zil nau ah lawtinna a chang ua, chuleh,

nasepna di le a mu sek u'i. Sawlkar nasepna neite'n le phatak leh taima tak ah a sep ua a hi chun a sepnau a kaisang sek ua, a hawi zaw leh pha zaw a muto sek u'i. Khut ah nasem mite le taima tak ah nâ a sep ua chun, kiningting thei a hui, thingtang ah lo bawl ah khawsa mi tamtakte le kiningting tak ah hinkhua mang a um kit u'i. Taima tak ah sem mite chu Pathian malsawmna le a dawng ua, chuleh a nasepna ga'u in a kiningting zo sek u'i.

2. Thatdana chu taksapna tuntu

Taimatna sang ah thatdana hinkhua i mat phat ua leh kiningtinglo hinkhua a tung zaw sek a hi. Thupilte ziktu chun "Aw thadapa, bang chan a hem la lup ding? Bangtik leh hung thodawk ding la hem? Lum tadi ing ka tin, chawmkhat imu kit tadi in khut angkua in kichawl nalai ing ka, la ti chun, chatgana chu gucha gual in hung tung intin; taksapna chu hiam leh thal chawi galdo mi gual in hung in a," (Thupilte 6:9-11) ti'n a gen tawp mai a hi. Paul

chun thatdana hi a huat hileh kilawm hial in ziagual hin a gen kit hi, "La kiang ua ka um lai khanle zia thu hi ka hun piau a hi kha: Kua'nle na a sep nawplo chun, nek le ne kihen," (2 Th 3:10). Thadate chu chaga di a hui in, chuleh nêk leh dawn ziang in le kininting zolo di a hui ti ei mu sak hi.

3. A tawm thei pen ah khawsak

Sap pau a chun 'minimalist life' a kitia, zia chu, a tawm thei pen ah khawsakna a hi. Sil leh chen, nek leh chak, In leh lo ki-khuallo di tina a hi pua, i mat thei di tawk ah khawsak di tina a hi. Mi tamtak kiningting zawlona zia a hileh, i sep daw sang ah i matzaw a tam zia a hi. Tulai khawvel chu du-amna leh huaihapna khawvel a hita. Mi zosia hi ênna leh îtsikna in a kidim ta, mi nei zosia nei guat di, ahiloleh, mi bawl zosia i bawl nawp ah, mi nek zosia i nek nawp phat a hileh i nei in a tit zo seklo a hi. Mipil leh mithiam tamtakte chun khawvel thil nei tam guat sang in, tawmcha nei

ah ‘*minimalist*’ hinkhua mat chu a têt zaw tau a hi. Zia chun lungawina leh kipakna um zaw in a gen u’i. Hebraite kiang ah Lekhathawt ziktu chun “La hindan uh chu enna panglo hihen; la nei dan dan un lungawi un” (Heb 13:5) ti’n a gen hi. Kiningting zolo i hi seknau hi eimau lunggel ah khawvel thil tamtak ngainatna zia a hi sek hi. Zia sang ah chun a tawm thei pen neite’n le kiningting tak ah hinkhua mat guat ding zawk a hi.

4. Sum leh pai mat dan thiam

Kiningting zawlo zia a hi sum leh pai mat thiamlo zia a le a hisek hi. Mipil Henry David Thoreau chun “mi tam zaw hin sum hawl didan a heu ah, himaleh, maktaduai lak ah pakhat ziang in le a mat ding dan a hepuau’ ti’n a gen hi. Sum muna di chu nasem peite â ding in a bei pua, thiamna neilo pen kisa te’n le sum mutheina ding ah nasep di a nei thei u’i. Maleh, sum matna lam a hin, matdan thiam hi a haksak hi. Tulai hun a hin sum leh pai tampi i mat seknau hi nek leh chak

leh Insung khawsakna sâng in, chep leh muam, nik leh puan ahiloleh, nawpchenna thil (Luxury items) a hi sek hi. Sawlchak Paul in Philippi mite kiang ah a gen gual in tawmcha nei dan leh tamtak nei dan hi zilthiam a pawimaw hi (Php 4:12). Sum leh pai matdan i thiam a hi chun tawmcha in le kiningting thei a hia, maleh a matdan thiamlote chun tamtak neileu le kitingzo seklo a hiu.

5. Mi chung ah kingalo in Pathian chung ah kinga’n

Tulai mi tamtakte hi kiningting zolo in, mi dangte chung ah kinga i tam sek u’i. Sum i mu nailoteu i mang sek ua, mi dangte kiang in leiba tamtak tak i nei khawlaw sek u’i. I sepdaw sang ah i matna ding a hung tam tak a hileh kiningting zolo in a ki-um sek hi. Mimal bep hilo, kochuam sung ziang a hin le, kiningting zolo a ki-tam hi. Mi chung ah kingak hi zawngsak thei a hi. Mi chung ah kingak sang in, Pathian chung ah kingak zawk di a hi (Tpl 3:5). Jesu’n, “a gam leh a dikna chu hawl masa tau in; tichun, zia thil

zosia chule piak belap in um in lau,” (Mat 6:33) ti’n a gen hi. Pathian ah kinga ah, theitawp sua ah nâ sem leu hin kiningting thei di i hiu.

Thukhakna

Kiningting tak ah hinkhua mat hi Pathian dawidan a hi. Pathian in mihingte a siam a chun, i pawimaw di zosiau le ei siam piak a. Himaleh, mihingte gitlona zia in du-amna leh huaihapna in a kidim ta, zia chun a

pawimawlo di tiang tiang dawina a hung piang sek ah, zia chun kiningting zawlona a hung tun sek hi. Tun hin, hinkhua kiningting tak i mat theina ding ua chun, taima tak in Pathian in sep ding ah ei piakte chu sem hitiu in, Pathian kiang ah kinga tawp leu hin Ama’n ei ngaitua ngei di a hi, ti hi he thak kit hitiu. Lalpa’n kiningting hinkhua mang thei chiat ding in ei malsawm taken.

MEIVÂK PANI A VÂK TAI

Numei pakhat a Hukdampa ding ah Khrista hung hechian pakhat chu – gitlo simna nei lunggil ah luanglet kipakna bîk ah dim pum in inlam a hung zuan ah, hapta tamlo a beizaw in, a khawsakna mun chu sualna a nasat bek zia in nutsia veng veng a nawp thu a gendawk ta a hi. Pastorp’a’n zia thu chu a hiat phat in, khaudeu takmai in, “Zia khawpi thuneitute hin meivak zosia hi lampi n̄n, leh lau-um zosia apat ladawk in mipha cha cha umkhawmnate leh sualna umlona munte bep ah meivâk kawi taleu bangtin la gel em? Khrista’n, “Zia khawvel vâk lahiu” (Matthai 5:14) eiti hilo ah’em?” ti’n a genkhum tai. Numeinu chun zia zilgaina chu pawm in, chawmkhat zaw in a Pastorp’a’u kiang ah chun, “Tuhin chu meivâk pani’n i lampite’u salvâk tadi a hi” a titai. Tichun, hinna pakhat Khrista kiang ah puilut in a umta a hi.

INSUNG AH NUTE MAWPUAKNA

~ *Pi Phalkhual*

Nu hîna Bible ah Adam in Evi, a ji chu mizosia nu a lah sak hi (Gen 3:20). Dr. Deehan chun, “Khristian insung chu Nu lopina, chate paradise, pate lenggam” a lah tia. Allen White chun nute chu, “Sungkuan lalnu a hi’n, a chate chu a khua leh tui a hi,” ti a hi.

Insung nu hi, a pawimaw ma ma ziang ah, a pawsalte uh leh a chateu kingakna le a hi. Nute mawpuakna hi a lian in, a tam ma ma ah, ziate lak ah chun pawsalte leh chate lak ah a mawpuakna gen hitiu.

1. Pawsalte lak ah mawpuakna

Nute’n a hinau leh a mawpuaknau a pawsalteu â ding ah Bible in ei genpiak chu vak en suk hitiu- Bible chun ‘Numei pil hin ama Insung di a siam in, a ngawlte chun vang a phelâk sek ui. (Thupilte 14:1). Ji chu a damsungsia’n a pawsal taksa bungkhat a hi ta. Ahin, a pawsal tawh a kilaichinna lam ah chun a mawpuakna di Bible in hiti hin ei gen piak a hi, “Jite haw Lalpa ah la hi ding ua kilawmgual in, la pawsalteu

kiang ah kitulut un,” (Kolossa 3:18) a tia. Chun, Ephesa Kochuamte kiang ah chun, Kolossa ah kigengual tho dan hi a hia, “Jite le bangkim bangkim ah a pawsal thunuai in a um diu a hi,” (Ephesa 5: 24). Zia ban ah chun, “Ji chunle a pawsal chu a tak in kîcha taken,” (Ephesa 5:33) a ti. Zia Bible chang a kipat in nu’n a pawsal lak ah a mawpuakna a sepzui di paguk i mu’u a hi, ziate chu: kituklut, thununna nuai ah kipia, a thu thu ah um, thu awi, za (kicha) leh hepi tite haw hi a hi. Jite’n a zui ding uh a zuilo ua a hi leh chu Pathian thu gensiat ah um in, pauchapna dâl ah umkha di a hi (Tita 2:5; I Peter 3: 7). Zia haw hi nisin hinkhua ah i zui ua chun Sam in a gengual ah,

a Insung ah gâsua a hin; chun, grep gui gâ nuam ma ma gual hi di a hi (Sam 128:3). Mihing hatna'n vang thil bailam chu hi khelpua'na; maleh, Lalpa Thagau Thiangtho hatna'n hi ngai in a.

Nisin hinkhua ah sepzui di leh bawl di khenkhat vak genbe hitiu. Nute hin a pawsalte'u hi a vaikuan, a vaitun hun un Lalpa zâl ah malzawl na a hi theina ding un pauchapna thadawk leh zintun thei zingleu hin dawi um ma ma in a (Dan bu28:6). Pathian ngaisak tak nute chu Lalpa'n a pauchapnau a ngaitha, a pawsalteu Pathian ngaisaklote (khenkhat chu ginglotu) chunle Pathian a hun mu' ah, Kochuam â ding ah mi phachuam a suak uh a hi.

Zia ban ah chun nute hi in lam ah buai ma ma ziang leu hinle lekha sim taimat a ngai hi, pawsal lunglutnate hiatpi ah, khawvel chankang dungzui ah i pawsalteu holim pithei ding ah kizil leh kisak a ngai hi. I pawsalteu bang chan ah'em bêk ah piltak leh chingthei tak ah taw zui ding ah kizil zêl hi i mawpuaknau a hi. Nisin

chanchin thute le hiat a ngai a, Bible thute holimpi ding ah hiat a ngai hi.

Zialo ah chun le Insung ah Nute holimna pilvan a ngai ma ma hi. Abîk tak in chate umna vang vang ah chun mi chanchin a salam ah gen khak di kiven a ngai ma ma hi. Etsakna'n, Pastor bang la dem khak a hi chun la chate Biak In ah kipat la hiatlo kal ah del mangtu hikha thei di la hi.

Ahin, Insung ah nute hi Bible in ei genpiak gual in In hawitak satu gual in a gen hi. Numei pil chun ama Insung di a kisiam in, a ngawlte chun a phelzâk sek ui (Thupilte 14:1). Nu pil a innsung siamtup di i kiphamaw ma mau a hi. Pilna hi Lalpa ah kipat a hin, a dawnte kiang in Lalpa'n a pia a hi (Jakob 1:5).

2. Chate chung ah mawpuakna

Naupang chu lamdik hil lechin a hung upat tiang in le petmang ta pua'na (Thupil 22:6). Naupang lamdik ah hil, kizilsakna (*training*) ah hin, Lalpa thunnuna leh zilngaina matngai a hi (Eph 6:4). Naupang in gitlona a pianpi a hidan Bible in ei hil hi (Sam

51:5; 58:3). Zia zia chun, naupangte kawlna hi matak ah pat ngal di a hi. Nu chu a insung ah zilsaktu(*teacher*) masapen a hi. Nu'n chate lekha hil pum in nasep thil tawh athua theitho uh a hi.

i) Thiamzilna: Nu'n naupangte school ah kaitheimau ah, in mun ah a hil di a hi. School a kai phat ualeh, pauchapna neipiak ah, a vathak ah a vapui kit sek di a hi. In ah lekhasimna mun ah etpi di, chutpi di, home work a bawltheilo ua lehle kithuapi ah hil di a hi.

ii) Thagau lam ah: Insung ah Pathian thu hil di, sungkuan kikhawpna matpi di, Biak In – Sunday School ah pui di, camp leh crusade na haw ah pui di, pauchapdan, sawmapakhat piak dan zilsak di a hi. A lungthim sung suangpek ua, Pathian hepina leh launa sundim piak di a hi.

iii) Chate ettawn di: Nu hi chate'n thianthona lam, ginna lam leh hepina lam ahte ettawntak a hi di a hi (cf 1 Tim 4:12). Pathian

thu gentu minthang Gypsy Smith in “Chanchinpha bung a um hi a tia, ziate chu Matthai, Marka, Luka, Johan, leh nangma la hi,” atia. “Amasa bu lite hi thugentu leh Sunday School zilsaktute'n a sim ua; a bungana hi khawvel in a sim a hi,” ati'i. Nu daw um tak mai chate'n chanchinpha a simthei umsun chu nang leh kei i hui a hi. Khatvei Bible kiletawd chi chuam chuam pha a sakteu (*English Translation*) a gennau ah chun a lak ua naupang khat chu ken vang ka nu ledaw (*version*) pha kasapen hi. A nu le daw Bible pen hin Pathian thudik a chate a mu sak thei hi, a lopi ngeimai hi.

Sap lâ phuak thiam leh Pathian mi ma ma Coleridge chu a nu'n mei-awi pum in, Bible tuanthu a neulai in a hil sek hi. Nu pauchap mi Susanna Wesley (John Wesley Nu) chun cha 19 a nei ah, zingkal sin in pauchapna hun dakkal khat a mangthei zing hi. A pauchapna gâ chu a chapa upa zaw John Wesley, Methodist Kochuam

phutdawktu leh thugen minthang a hia, a naupa Charles Wesley chu la thiam mi a hin, “Jesu min a chungnung pen hi,” ti phuaktu a hi. Nute’n Jesu damlai ah thil thupi tak a lah bawl uh chu a chateu Jesu kiang ah a hunpui ua, Lalpa’n a malzawl ah, a luchang uh a lah khawipiak chu a hi (Mat 19:13-14; Luka 18:15-17).

Chate hi thagau thitheilo nei a hi ti hezing hitiu in, Nu nasep pawimawpen chu i chateu Jesu kiang ah pui hi a hi. Zia nâ lopitak chu i sepdaw theina ding un eima nute ngei hin chanchinpha chu hinpi leu hin, i chateu hilsawn thei di i hui a hi. Bible chun “Numeichîng chu chenna in a pia’n, a chate â ding ah nu nuamsa leh kipak in a siam hi,” (Sam 113:9) a ti a hi.

3. Thukhakna

Dr. Lalzakung Tusing nu chun, a la phuakna chun,

*“Lalpa ka sualna ngaidam in,
Sim in ka hung hi la kengbul ah
Vawncchawi dawntuaigo ka
chanteu hi,
Belam huang a hun puilut gaw
tang ka,”*

Ahin, tuni nute mawpuakna ah hin, nu Pathian mi chu a pawsal leh a chate Jesu nei nailo a um khâk chu, Jesu kengbul a pui ding in pauchap thak kit hi tiu.

Jesu’n mipi sangngâ vakna khan vaithum panga leh sanga pani puaksaktu kha nu chingkam tak hi ngei ding in a ginchak um hi. Nu chu mutheilo ah mawpuakna semdawktu a hi.

Nu hîna hi kona thiangtho a hin, Pathian in a kona leh a guatna chu a hi. Pathian mi Hannah pauchapna leh etkawlna jal in jawlnei leh thiampu Samuel a piang hi. Api Loisi leh anu Euniki pauchapna leh etkawlna jal in Timothi chu naupang cha himaleh Kochuam puitu dawî-um leh gasua tak a hi.

Khaile! Na lopi tak tak nu lopi tak tak nasep haw hi entawn in, ei hawn le i chateu Jesu kiang ah pui in, Pathian â ding ah matthei a hina ding un, siampiting ding in i mawpuaknau suhpiting in pan la chiat hi tiu.

Lalpa’n simtu zosia hun malzawl ta hen!

PATHIAN ÂNG AH PAWMTÂK HINKHUA

~ Pi Kh. Thianniang

***Pathian âng ah pawmtâk, nasemtu jachâkna di neilo, thutak
thu chu diktak ah hilchian thei mi hi ding in la theitawpsua in
2 Ti. 2:15.***

Paul in Timothi kiang ah a lekthawt hi i et chun, mihing hinkhua hi Pathian pawmtâk a um leh, Pathian pawmtâk lo a um hi tina a hia, chuleh, Pathian nasepna him him hile Pathian pawmtâk a um leh Pathian pawmtâk lo a um hi tina a hi. Tuni ngaitua ding ah pawimaw chu Pathian na i sepnau hi Pathian pawmtâk a hi em ti hi a hi. Pathian âng ah pawmtâk hinkhua chu

bangti nei di?

**1. Kithawina hing leh
thiangtho Pathian pawmtâk
hi ding ah i taksau latdaw
ngam (Rom 12:1)**

Pathian nasemtu, Pathian gingtu kigwat, himaleh, i taksau Pathian pawmtâk ding ah pedawk ngamlo Khristian tampi i um ui. Nêk leh dâwn thu, sil leh chên thu, nêk leh châk hâwlna Pathian pawmtâk hilo ah gamta zing, eimau la

Pathian nasemtu gin-um ah kikawi i hinau hi Pathian âng ah pawmtâk i hilonau a hi. Pathian pawmtâk hi ding ah chu i kipiaknau, i thillatteu chu a thiangtho di a hi.

**2. Pathian âng ah pawmtâk
hina ding ah chun chên
ngam a pawimaw hi (Phl.
3:7)**

Tulai i gingtu hinkhuau ah Pathian âng ah pawmtâk

i hilona ziak uh pakhat chu eimau lâwkna di bep ngaitua ah i nasepnau hi a hi. Paul in, ama â ding ah lâwkna um theina phawt chu Khrist ziak in chânnan a guat jel a hi. Pathian â ding ah a phachuam di ngaituana sâng ah eimau lâwkna di buaiپی, Pathian kona panglo ah nasemtu, sum muna di bep ah nasem, i nasepna neitu Pathian sang ah mihing mêl en zaw, Pathian pawmtâk di ngaituana sâng ah mihing pawmtâk hi di buaiپی zaw nasepna hi Pathian a ding ah kidak-um a hi. Pathian min ziak ah chân ngam ding in kisa phawt hitiu.

Thukhakna: Pawmtâk ah um leh pawmtâklo ah um hi ti hiai tiu in, Pathian âng ah pawmtâk i hina ding ua dâltu umte paitha ngam ding in kisai tiu.

3. Pathian pawmtâk hina ding ah chun i gin Pathian ah kingak ngam a pawimaw hi (Danial 3:17)

Tulai gingtute hi i gin Pathian ah kingak ngamna neilo, Pathian ma ah a zamse sa i tam ui. Sadrak, Meshak leh Abednego, a gin uh Pathian ah zamse ngailo, tum meipi lau um tak in a sukling zawlo a hi ziak un, Pathian âng ah pawmtâk a ting hi. Danial le Sakeibaknei kul lau um tak in a sukling zawlo Pathian ginna ziak in, Pathian âng ah pawmtâk a ting hi.

Pathian Gin ziak in Haksatna leh Gentheina zosia chu ei lakmang piak ziang di a hi pua.

Ahinla, haksatna leh beidawnna mun ah ei kitawnپی zing ah, ei thatham ngai pua, kinepna nei in ei siam a hi.

A ziak chu mihingte muphaklona khêl lam in Pathian in nâ a sêm sek ngâl ah.

~ C. S. Lewis

CHAWIHAWINA SÂNG

~ *Upa Kaikhokam
Compound Veng*

*“Pathian chawihawina sângtak chu a kam un pawt henla,
chemjam hiamtua a khut un chawi uh hen...”*

Sam 149:6

Zia Pâkna lâ imu gual in, chawihawina “Sâng” a um chun, chawihawina niam le um ngei ina. Ahileh chawihawina sângtak ah Pathian pâkna i kam apat pawt di leh chemjam hiamtua i khut ah chawite hi bang a genna a hi ta diam le?

Nasepte 16:25 na i mu gual in *“zân khanglai tak in Paul leh Sila chu a pauchap ua, Pathian pâk in lâ a sau ah; suangkul ngâkte zosia’n a ngaitha zing ua.”*

Zia suangkul ah a tân gual un, ei uh le um kha leuhin kipakthu a hem chawihawina i pethei diam ngaitua khamtak a hi.

A hiloleh Abraham-te nupa’n kum zakhat hial a tin nung ua, a thisa tawbang ah ngaithei ta, a zi chîng hinalai chu ginna tasam in Pathian

thutiam chu a ginglel diak pua, ginna hâtak in Pathian a chawihawi zaw tai ti i mu thei ui. A dinmun gual hi i dinmun hileh chawihawina la pethei diam?

Job ngei le a nei leh lam, châ leh nau Lalpa apat a gochan natiang a chân nung in le a petu a hetchian ziak in *“Lalpa min chu pak in um taken”* a ti thei hi (Job 1:21). Sawlchak Paul in haksatna, sukgentheina, thawkna, sawina, kial leh châk a thuak lai inle Pathian a pakcha zaw a hi.

Zia haw zosia i tuak lai inle, Pathian Chawihawina i piak zawk di a hi ti ei zilsak hi. Ziate haw hi a hi *chawihawina* “sâng” i tite chu.

Jawlnei Nehemiah in kulbang a siam lai ah a dinmun ei geldaw sak hi. *“Lalpa kipakna chu la hâtnau a hi ngâl in”* (Nehemiah 8:10) a ti gual in zia nâ thupi semtute chu â khut langkhat ua nasem zing kawm in, a khut langkhat un gâlván a chawi chiat ui ti i mu gual in, zia hi a hi Sam 149 na chun chemjam hiamtua a khut un chawi uh hen a ti hi ngei ina.

Chawihawina sâng piak zia in suangkulte a kilinsak ah, a kawtkhakte hawnsaktu leh ama lunglam hawl zia ah galzawna leh a thupiake zui zia ah zawna van gi leh gialte mangcha a mite kiang ah kilâksektu chu.

Zia zia chun, Pâkna labu pumpi hi i et chun bang thu chun khawm in gen lehle siamtu Pathian pâkna lam ngen a hi. A diak in Sam 148 na châng 14 sung a hin, Van

ah thilsiam zosiate, Lei ah thilsiam zosiate, Tuisuagiat nuai leh hinna nei leh neilo zosia’n le Ama pâk di hi a genchian ma ma hi.

Nisin ah i mamawte nêk leh châk, sil leh chen, damna hiselna i chante, malsawmna chi chuam chuam i chante zia leh i suapi sanggam, In sak, In thang i chenkawmpi thei di Lalpa’n ei piake haw zia ah Pathian chawihawina i piake hi chawihawina niam hi ngei ina.

A tawpna’n, ei haw hi Pathian in ei siam bep hilo in, a golua ding ah tel leh guatte haw, Pathian châ saktâk, nu leh pa, lawi leh paite haw ngaitua thak kit hitiu. Thim thuneina apat gualzawna i nei tau em? Lalpa’n a lua dim hinkhua la nei tam? Pathian kiang ah chawihawina niam lântu la hina pat khan chawihawina “sângtak” lânthai mi hiding in kipanthat kit hitiu.

Simtute Lalpa’n hun panpi ta hen.

SAMARI MIPHA TEKHINTHU

(Chia'n la nang inle ziagual chun va bawl ta'n)

*~ Upa Ginkholian
S. Munnuam*

Luka : 10:27-28

Ama chun, "Lalpa la Pathian chu la lunggil zosia leh, la hatna zosia leh, la lungthim zosia'n la hepi ding ahi. Chuleh, nangma la kihepi gual in la Invengte le la hepi ding ahi, ti ahi," a tia. Jesu chun , la dawnhu dik ma ma hi, ziagual ah chun vabawl lechin hing in la, atia.

"Thil zosia ka pa'n ei piakdaw a hita'n, Chapa chu kua a hem, Pa tilo chu kuama'n a hepua'n; Pa chule kua a h'em, Chapa leh a kiang ua chapa'n a puandawnate beplo ngal chun kuama'n a hepua hi, atia. A nungzuite lam in a kihei ah, a chuam in a kiang un, la thil muteu hi a muna mitte chu a hampaha na e, Leng leh Jawlnei tam tak te chun, zia la thil muu haw hi mu a la hnawp uh ahi, himaleh, a lah mu man ta puau hi, chuleh, la thil hiatteu hile het a nuam ui, himaleh, a lah he man ta puau hi".

Mu hingal ah muchianlo, he hingal ah hechian tawklo, dan thiam pa gual ah um thei a hi zia in tu chung ah hin, Jesu'n banggual mite kiang in leh kuate kiang in a h'em nangma'n le ziagual a chun va bawl tan ati.

1. Danthiampa

Pathian thu he ma ma ah kingaite leh het le he bawkte kiang in chanchinpha hi a hi gual tak in a tung zo tak taklo

a hi dia aw ti thei ding in a um hi. Danthiam pa hin Jesu kiang in hotupa kumtuang hinna ka neitheina ding in bang ka bawl diam tia a dawtna kipat ah hin i et leh ama patepna ding in ti a hi. Pathian thu i hetteu leh i zilteu hi zia mipa gual a hi matthei a hi ti a kichian tawk ah, eimau inle ama dinmun apat zildaw di um chu i hiatnateu i theinateu leh i mu, i chanteu hi midangte â ding ah gapha a sua theina ding ah

eima lam kimu chianna mang hitiu in, mite kophil/patepna manglo ah, Pathian gam Chanchinpha tawh kituak ah pan lakna mang zaw ding in i kidawisak hi.

Tulai paukam ah i mat tangpi chu kuama Pathian thu helo i um ta puau ah, ti a hi. A dik tawh tho ah, ahinla, kuama Pathian dawidan ah khawsa i um ta puau ti zawk didan a hi ta diam, a zia chu Pathian thu hi a hi gual tak ah i mu chianlo zia uh leh i hetchian zawlo zia uh leh i zui zawlo zia uh a hi zaw diam ti hi ka ngaituana ah a um sek hi. Mani hawina lam, mani hetna lam leh mani khawksakna lam ahte hin ei bûkzaw deu le a hi ta dia aw ti thei di'n a um sek hi. A he nuam a mu nuam tamtakte'n mu manlo maleu ei hawn vang i mu i chanteu leh i hetteu hi Pathian lopina di bep ah mang di leh bawl ding in i kidawisak hi.

2. Invengte

Ama leh ama thiam kichan gua'n Jesu kiang in ka invengte chu kuate a hui em? Ti in kihetsak tak gual in a dawng

ta, ahinla a ginchakna khel lam in Jesu'n ziagual hin a hilchian hi. Mi kua a h'em khat Jerusalem apat Jeriko zuan in a chia suk leh, guchate leh suammangte a tuakkha ta, a puante lakpiak in a hiliam ua, a thilo bep in a nusia tau. zia lampi chun Thiampu pakhat a hung ah, himaleh, a mu phat in lam pam langkhat lam in a pêl tai. Ziagual ma chun Levi mi pakhat le a hung ah, a mun a hung tun phat in a vak en ah, ama'nle lam pam langkhat lam in a pêl kit tai. Himaleh, Samari mi pakhat khualzin in a hun tuakkha ta'n, amu phat in a lungsiat ma ma, a vazuan ah, a liamnate chu ua-in leh sathaunu piak in, a tuam piak tai. Ama sabiltung chung ah chun a chuansak ah, khualbuk pakhat in a puilut ah, a kaitua tai. A jing ah a nutsia di kuan in, denarii dangka pani a ladawk ah, khualbuk vengpa kiang ah chun a pia, a kiang in, zia hin ama hi a lah kaitua inla, zia khel ah hin la senna a um leh, ka hung kit phatleh hun dit ingka a ti malam hi.

Jesu, n dân thiampa kiang ah chun, a leh zia gucha tuak

khapa a ding ah hin, zia mi pathumte lak ah a kuapen hi a inveng chu hi ding in la gel em? a tia. Danthiampa chun a chung ah jangai pen pa chu, atia. Zia phat chun Jesu'n a kiang in, ahileh chia inla nang inle ziagual chun vabawl tan, atia. Zia hunlai ah Jesu'n Samari mipha tekhinthu a genna ah hin, Thiampu leh Levi chite lawm lawm inle ziagual tuk ah kidâidanna awng liantak mai a lah siam chu a hi tau hila maw ti thei di khawp in i mu ah i he tau hi. Amabo chu Unaute haw tulai ah ka ngaitua lian ma ma chu amu'u ah, a muchian puau ah, a hiau ah, a hechian tawklo uh a hi. Zia ziaq chun sep ding ah Pathian in a hun guatna hi muthei di bep ah sem hilo in mutheilo lam leh muthei lam ah le gapha sua thei di khawp in panlakna'n mat thei gua chiat ding in i kichial a hi.

Mani hina tawk ah hethiam ma ma kingai ah zilna lam ah le huntawk ma ma ah kingaina lungthimte hin, Pathian gam tung zo tak taklo a hi ti a kichian ah, Lalpa Jesu'n keima'n khawvel hi ka zo tai a lah ti ahi'n, zia khawvel ah

hin gingtute chenna mun ding ah a lah guatna mun ah hin, a lalgam tung sak ding in ei muang ngam a hi ti hemil puai tiu. Zia ding ah chun Lalpa'n ei guat ah ei ko a hi.

Ngaisan umlo leh bangma i ngailote haw hi chetna a lah hi nuam sek hi. Thiampu leh Levi te'n kidak um leh mualpho um tak ah ngâi ah, a pêtсан mai uh ahi'n, ahinla, zia laitak chu a hi a pawimawpen khat chu, gingtute hin Khrista zal ah bangkim huam ngam ah panlak zel di a hidan a kichian tawk ma ma hi.

Zia chu a hi ziaq in hun lemchang i nei dan dan un, mizosia chung ah thipha bawl chiat hitiu in, ginna i Inkuanpитеu chung in bawl diak hitiu. Kua hi ka inkuanpите, kua hi ka invengte, kua hi ka kilaichinpите ahiu vem ti muchiantu leh hechiantu hi di leh i mu leh i hetteu leh i chanteu hi Pathian lopina di bep ah panlakna mang chiat ding in nangma leh la insung mite chung in Pathian gam chanchinpha hung tung zing ta hen. Amen.

INDIA MAL-SUA POLITICS KISANG LEH KHRISTIANTE

~ Rev. Dr. Lalfakawma Ralte
Professor UTC. Bangalore

Thumapui – India Mal-sua (Northeast India) hi tu masang in, India gam bung chuam chuam te lak in danglamna bîk a nei hi. Sakhua, Nam chawndan leh kivaipuakdan zatchuam tak nei in, mi nuai ah kûnlo, mani ah kidawi tawkte i lah hiu a hi. Politics thil ah chun, Bharatiya Janata Party (BJP) hi Hindu sakhua tawh kikungkaina dettak nei a hi. Phaipi ah chengte â ding bep ah kawi a hia, ei uh tangsang chung ah chengte â ding in vang mun a hung nei ding uh chu suangtuana khêl lam a hi.

Zia zia chun, tuni tiang hin, ei uh India mal-sua ah cheng te'n BJP hi political party (pakhat gual ah ngai) sang in Hindu sakhua movement thezaktu leh suhingtu gual ah ngaina a sang ma ma ah, a dikna tiang a um hi. Ziagual a hi zinglai in, phutlo in Phaizawl ah BJP te chun, i chenna gam mal-sua tangdung mawitak leh boruak thawveng tak kal ah khawsate hi, sawlkar thuneina in mun ei siamkhum zial zial ui. Mizoram tilo India mal-sua state sung ah BJP in a lutchillona mun him him a umta puai. Zia hin, malam ah kinialna tawptheilo di a piangsak ah, a bîk tak in

Khristiante hin kinep guallo tak ah BJP'n jung ei thâkhumna maitua chiat di hileu hin a kilawm hi. Nuam in nuamlo maleuhin, Mizote leh India mal-sua ah cheng i unaute hin, 'hun thak' i lah tuak ngailo, a lampi le i lah haw khak nailo ah chun, ei sawmlut khawm di a hi. Zia 'hun thak' hi ei Khristian te'n bangti'n i lah maitua ding uh ei diam? Tu dinmun â ding ah dawtna liantak leh pawimaw tak um chu a hi.

1. Mal-Sua ah BJP te masawn zel dan

Meghalaya ah National People's Party (NPP) kaihuaina nuai ah, Conrad Sangma in

sawlkar a enkawl hi. Sawlkar siamtu NPP lak in BJP te le a pang ua, zia sawlkar chu khangthak zawte'n a etkawl uh a hi zia in, kinepna liantak a gam mipite'n a nei ui. BJP te'n MLA pani bep nei maleu, sawlkar siamtu bûl (King maker) a hi zia un, thuneina a chawisang ma ma ui. Meghalaya sawlkar kivaipuakna ah hin le kigawl na liantak a nei ding uh chu mi zosia suangtuana a hi.

Zia BJP MLA panite hin Meghalaya gamkai, boruak nuamtak “sûm daitui in ei chupna gam” ah hin, Phaipi ah Hindu culture chawndan a lutchil pi ding un lung awpkaina liantak a kinei hi. Assam ah BJP kaihuaina nuai ah National Democratic Alliance (NDA) te'n vai a hawm ua, kum 2016 kitel hun ah seat 86 a lua'u ah, Congress in seat 26 bep a lua hi. 2021 kitêl hun ah BJP in MLA 64 hial a nei tau a hi. Kum chiata 2014 kitelpina ah khan BJP te'n thupuan a bawl uh chu, “tel tin a hi ngei ngei uh chun, Hindu mi leh sa, gampam ah um hitaleh a haksatna tuakteu chu India

gamsung ngei ah venbitna piak a tiam thu a tangkopi tau hi.” Zia suk pitinna ding in Citizenship Ammendment Bill, zia ban ah chun ‘Act’ mutheina ding in malakna a buai pi nasa ma mau hi. A lawkna ding taphawt ah mâ alau ah himaleh, sawiselna vang a tuak nasau hi. India gam Prime Minister Pu Narendra Modi leh a party BJP chun, amau vote petu di leh vote pezel thei dite (vote bank) Bangladesh ah kipat Hindu hung pemplutte angvân in a chung ua hepina a latsak zia in demna leh sawiselna nasatak a tuak u'i. Ziagual ah BJP te tawidan hi thil dang hilo in politics ah lawkna sawmlut zel a nawp zia uh a hi ti chiantak in a taklang hi.

BJP te thiamna (tactics) ma ma chu, a ut hun hun ua amau lawkna di a hi phawt chun, midangte angvân ah amau lam ah pang ding ah huailut hi a hi. Tu hin India mal-sua ah pawl hat tak leh detdo tak a din uh chu, Northeast Democratic Alliance (NEDA) ahia, zia mang in nasatak in malakna a chiapi'u hi. Himata Biswa Sarma, NEDA convener

chun, tumasang ah a lah um ngailo, thil thak hung um mal-sua mite tawh kilaichinna phazaw siam in, malam ah nasatak ah pan lakkhawm zel di a hi thu a gen hi. A malakna ding ua thil a ngai pawimaw te'u chu, Tanggam ah chengte, chawndan (culture) venbit piak leh a malai sakhua biak leh zui teu apat kikungkaina hawl in, a khawtang hindante'u zawpmat a gaw ham ham ui.

Tanggamte chawndan ah Arunachal Pradesh gam mite sakhua, 'donyi polo' (ni leh tha biakna sakhua) betute chu Hindute chun, amau sakhua bak pakhat gual ah ngai in a tûk ah tuchak in, a pawmpi khawpmai ui. Zia sakhua zuitu Arunachal mite chu India gamsung ah sakhua mun pawimaw tak tak ah, a thawn in a pui ua, naupang hunkhawpte chu Hindu sakhua zilna mun phatak tak ah chun a thawn ah zilsak in chuleh, lampi chuam chuam kawng bangkim in a panpina a pia'u hi. Hindute panpina zal ah 'donyi polo' sakhua zawmtute chu hung punbe zel di a hi'u ti kinepna liantak a nei ui. 1978

kum in Arunachal Pradesh gamsung ah umte kiang ah, sakhua kithen khapna dan (Anti-Conversion law) a lah um tai. Mizoram ah chun "Setana Bill" a ti hial ui. Zia dan chu hing zing maleh, hun sawttak apat Khristian kibelap zelte zia leh thil dangte zia in a kimang tak tak puai.

Boleng bial ah kum 2007-2011 sung ka um lai in, zia dan (Anti-Conversion law) zia ah chun chawbuai in kala um ngai puai. Sakhua dang zuitute apat in, haksatna lampi chuam chuam in katuak nasai. Zia "Setana Bill" tia i lah hiat uh kha, Arunachal ah hin sukhin kit in a hung um ah, Khristiante â ding in banggual ah buai-um a hung hi diam ti hiatchianna ding in hun lut tadi nalai di a hi. Khristian hung pungto zelte zia ah sawlkar puitute chu lungawi puau ti chu chian tak in a hiat thei hi.

Nagaland ah BJP leh Nationalist Democratic Progressive Party (NDPP) te'n lungtup kibang sawlkar tawh lamtual sial khawm in, a politician minthang tak

Neiphiu Rio chu Chief Minister ding in a sawn kai ua, BJP in hun masa a khan cabinet minister 3 a nei un, tu hin 5 a nei tau hi. Nagaland sawlkar ah BJP ten MLA 12 hung ki belap zel hin, Nagaland state hi Khristian tamna gam hingal ah bang zia ah BJP in mun chang ah masawn zel thei a h'em? bang zia ah gam keklian zel thei a h'em ti hi thil mak leh dawtna pawimaw tak um thei chu a hi.

A dawnhuna um thei chu, BJP te'n Nagaland mimasa pi leh pute sakhua biak "Heraka" chu sukhin thak ah dawpsan piak a thiam zia uh hi ngei ding in gingchak a um hi. Nagaland nam pakhat Zeliang tribe kitite hin, masang lai ah a sakhua biak uh "Heraka" biakna chu sunzawmzel a hi tuak ui. Zia "Heraka" movement leh Hindu sakhua chun kizawpna thûktak nei in a ngai ua, BJP te'n lemchang ah la in, amau kidawpsangna ding in a mang phachuam u'i.

Tu masang deu ah Swami Ramdev in le Nagaland ah project liantak a lah neipi gawtai. Project thupi tak tak

a luaithak pi ah, ziate chu; Nagaland ah Management College, Para-Medical leh Nurshing College, National Institute of Fashion Technology, Ayurvedic College leh Engineering College hawndaw ding ah thiltup guanggalna a neipi hi. Zia nasepna ding ah hin, Nagaland sawlkar chun College te sakna ding in gam a piak di a ti'n, Swami Ramdev leh a company Patanjali te chun sum leh pai a kithuapi di a hi ti'n a gen hi. A nasep lawtinna ding in Public-Private Partnership model chiapi ding in malakna a siam hi. Zia Collage tundinna ding ah suangphu phutna thugentu Parliamentary Secretary for Boarder Affairs, Thomas Lotha chuna project thak guan uh hin, "sakhua tawh kizawpmatna bangma a nei puai" ti'n a gen hi. Zia malakna hi ginchâk khel ah duthusam gual ah chiathalo a hi zia in, ginglatute lungthim ah muanmawna a lian ma ma hi.

Manipur ah BJP in seat 60 lak ah 37 a lua ui. 2023 kum ah gamsung buai zia in Khristian te'n dinmun setak, haksatak

leh nuaisiana a maitua ui. Biak-In tamtak haltha in a suhsiau ah, Pastor leh Khristian puitute chu sawisak in a um ui. Trulock Theological Seminary, Pathian thu zilna mun ngei le vaivut a chansak hial uh a hi. Zia BJP vaihawmna state te ban ah Arunachal Pradesh ah hin le BJP in seat 60 lak in 46 a lua kit hi. Tripura ah hin BJP te etkawl NDA nuai ah seat 32 a nei kit ui. India mal-sua pumpi ah hin BJP in nasatak ah mun nei in a masawn ma ma u'i. Ziagual chu a hi zia in mi tamtakte patau in a lau ma mau ah, khenkhat in vang lau nachang helo leh lau di gual in le a kaw thei nai puau hi.

2023 kum in U.S. state deprtment in report a siamna ah chun, India mal-sua lam ah hin BJP te vaihawmna nuai ah Khristian umte'n sawisakna nasatak a thuak ui ti'n a gen u'i. Ziagual chu thil umdan a hi ti hezing ngal ah, bangti dan ah eima Nam chawndan leh chiapidan ngaisangtu leh vengbit utte hin, BJP te vote pia, phungvukna bawl bawl ziang sek i hui em ti dawtna hi dawnhuna hawitak leh kitup

tak pe ding ah i ngaitua chiat ding uh a hi.

State tamtak ah BJP in mun a lua zel dan ah hin, nam tawmte leh nuainung zawte apat thiamthu gen di bangma a um pua, a dikna gen ding in kamkek thei di dinmun ah le a ding puau, ti hi a kichian khawpmai hi. Chutia a chenna gam sung ngei ua mun a lua khum zotau ah, nawldi gual a hilo zia a hetchian phat un, lemchang hawl in mimal phatchuampi di a ngaitua zaw tau hi. Kidinte ah gâl bawl thuk sang in BJP te apat hamphatna mu di zawk a ngaitua u'i. Sum leh pai ah hamphatna, Central apat luanglut thei di thil zosiate mat phatchuam gua'n pan a la zawtau hi. Ziagual ah a bawl zia in un BJP party te thangai ma ma gual in kilang maleh zia chu hizawlo in, amau apat phatchuampi thei di thil tamtak lakdawna ding in lemchang ah a mang zaw'u a hi.

2. Bang zia in Mal-Sua mite'n BJP vote a piak sek uh hem?

2.1. Amasapen in, BJP te'n mathilna (vision) sautak

a nei ua, zia sukpitinna ding in lungthim pilgûkna tak nei in awl awlcha'n malakna a chiapi u'i. Bawl di leh sepdaw di a neiteu chu a ban ban in a sem piting zel u'i. A mapuitu Sunil Deodhar leh a teamte'n tanggam mite lungthim thuzaw di gua'n a hitheina zosia mang in pan a lau hi. Zia mite panlakna nawl guallo ah thingtang mite ei thuzaw'u a hi zia in, ei thepthakna te'u mangcha'n panmun dettak tak a kikhaw'u ah, gam a keklian zel ua, a masawn ma ma u'i.

2.2. Panina ah chun, mipite'n sawlkar masa ah vaihawmtute chung ah lungtunlona liantak a nei zia un, BJP te'n lemchang ah la in India mal-sua tangdung zosia ah hin nasatak in panmun a khaw u'i. Congress leh tualsung party (Regional Party) dangte'n mipi dawikhawp di masawanna ngaitua piak zolo gual in a ngai ua, a thutiam (manifestoes) ah gin-umlo, masawanna mu

ding ah kinepna him him umlo ah, a lungthimteu a suhpatau zotau hi. Central sawlkar tuzinglai BJP ah hin, mipite chun, a mamaw ma ma masawanna sukpitin piak ngei ding ah kinepna lian tak nei in a bel zaw tau hi.

2.3. Pathumna ah chun, BJP in masawanna ding ah guanggalna a hung luidawteu chu, Mal-sua ah tanggamte lungthim a suhkha ma ma hi. Tang mite'n Central tawh kizawpmatna a phatlo chun, i gam puitute fel ma ma ziang leu le, hamphatna di thilpha bangma semdawklo di a hui ti hi a he ma ma u'i. Zia zia ah chun, Arunachal mite'n a bawl gual un, Cenral sawlkar tawh kiguizawpna hawitak nei hi galzawna matchak hawitak hi ding in a gingchau hi. BJP party a dawi zia uh hi diaklo in, a gam â ding ah masawanna leh hamphatna a hung luanlut di a kinep zia un BJP te chu vote manpha

tak tak a lah pia sek uh a hi. A tangpi ah ngaitua in Congress leh tualsung party te'n mipi kinepna a suk pitin zaw seklo zia un, vote piak dipen helo gual in a lah um sek ui. Zia zia chun, India mal-sua sung ah Mizoram state tilo state dang zosia te'n BJP ah kingakna liantak a lah nei zaw'u a hi.

3. Khristian te'n bang a h'em i bawl thei?

Mizoram bik hi vak thil leu hin, BJP malakdan et in khat vei tei chu bangtik hun a h'em leh lutchil ngei ngei ding in gingchak a um hi. Zo-cha Khristiante â ding ah hung ningtel um ma ma thei leh ningtel um keilo ah le um thei di dinmun in a um zing hi. Bang cheng gen leu hin le, BJP hung khanglian zel ding ah hin, Kochuam leh Khristianna a sukbuailo theina ding in zia a nuai ah gual hin pan lakhawm thei leu hin a dawi um hi.

3.1. Mi dang sum ah kingalo in, kitodel a ngai hi

India gam ah Kochuam tamtakte hi, kitodel zolo

ah gam dang apat panpina (sponsorship) ah kinga i um siau siau ui. Amau guallo tak in Mizo Khristiante a hi leh vang mani keng a ding leh kitodel a hiu ah, zia hi a hatnau thuguk pawimaw ma ma vawpphat zing di chu a hi. Tualsung Kochuamte a kitodel ua, a hat zawm zel uh a hi chun, gam dang panpina sum leh thil apat kikawi kang thei di a hiu. Tu hin BJP in Foreign Contribution Regulation Act (FCRA) mang in kochuam dangte sawisa sek maleh midang sum ah kingalo te'n vang ziagual sawisakna chu tuaklo di a hiu.

3.2. Kochuam lianzawte zawp

India gamsung ah Kochuam lian tak tak kipunkhawm ah dingdette hi, Hindute leh BJP sawlkar te'n le chawkbuai ngamlo deu a bang hi. Zia Kochuam lian tak takte hin, member a hau ua, sawlkar lak ah le kigawl na thûktak a nei zia un, Hindu te'n a suhbuai ngam puau.

Masang apat Kochuam lian tak tak a lah um khawm te chu; CSI leh CNI te hi a hi. Sawlkar in le bangma a law ngam puau ah, amau kizawppi te'n a zalzo in Kochuam lian nuai ah muang leh bit in a um ui. National Council of Churches in India (NCCI), North-East India Christian Council (NEICC), leh a dang dangte mangcha'n Kochuam leh Sawlkar kimaituana dite apat pan i lakhawm sek un, pan khawm dan i thiam zel ding uh a hi.

3.3. Nam ze-mawitak apat Khristianna suklat

Hindu miphalêm leh kiphatsakte'n India gam ah Khristiante ei sawiselna'u lianpen chu Tumlam gam (Westernisation) hindan in ei lutchil nasat ma ma hi a hi. Ei uh Zo chate vang vang hi; i kicheidanteu, mel leh puam mai ah hin le China te melput kipua, zia pat chu kum sawtlo cha hung pemlut gual in ei ngai ui. I In sakdanteu leh i kivandanteu apat

hin kibulphuna chanchin mumal tak neilo gual in ei ngai ua, bangma'n ei ngai puau.

Zia zia ah chun, India mal-sua ah cheng Khristiante hin a bîk tak in, Zo chate mel latna langsalpen chu Nam ze-mawitak nei i hiu ah, a langchang in taklang leh pholang zel leu hin, i hina diktak min ei zâ piak ding uh a hi.

India gam ah Kochuam dangte hin, a nam uh kut (festival) pawimawte, Khristian ah sawmlut nachang a hetau hi. Onam (Kerala mite kut), Pongal (Tamil mite kut) leh Khristian dangte'n le zia kut a neiteu kha Khristianna ah dawmlut zel in a kinei sak ma ma ui. Zo chate'n kut i neite lak ah i mat thupipen chu Chapchar kut a hia, Khristianna tawh kituak in i sawmlut ua zia mangtute'n ngaituana chîmtak nei leh zâ um tak in a kimang sek hi.

Tumlam mite umchan

suhlang thei thil i dawpsang lai sia, Hindu te'n ei hibuai ding ah kisa zosa a hiu. I nam ze-mawitak suhlang thei thil i dawpsang zawk a hi chun, zia ngei chun ei vengbit in tin, mi dangte zâna matchak pawimaw tak ei siam piak di a hi.

Thu Khaikhawmna – Ziagual ah India Mal-sua ah BJP te'n gingchak umlo tak ah masawn zel a hi zinglai ah hiat ding ah pawimaw ma ma chuh “Kairos Thak” (Hun thak) i la tuak khak nailo hun ah ei pui galkai tai tina a hi.

Masang ah Greek te chun ‘Hun’ ti hi thil pani in a khen sek ua, pakhat chu “Chronos” a hia, zia chu hunbi a ban ban cha kilemtuak a h'em, kigual tak ah kitiang tuak ti a h'em in a mang ua. A panina chu “Kairos” a hia, zia chu hun chia zel ah hun hung kihei tuak ah hun pha “panthak lakna ding ah hun mantam” i ti gual kha a hi. Tu hin dawi in dawilo leu hin le, masang gual ah BJP panlona hun ah tanggam dinmun kha a hi thei ta puai. “Kairos” hun

thak ah kisitua leh kichuang kaito i hi tâk zia un, tu hun ah hin, Jesu Khrista i ginna latsak hun leh a tak ah hindawpi hun chu a hi tai.

Khristian hindan diktaktawh BJP te maitua leu hin, launa di bangma a um puai. Gingtute ei sawisak nasat po leh i ginnau sukthak piak in i um ua, Khrista zal ah Khristiante chu nasatak ah i pankhawm zel ding uh a hi.

Nu pakhat in, “BJP te'n hindu sakhua nasatak ah a chiapi hi thil lau-um tak gual a hi zinglai in Communist nuai ah Khristiante a ding det thei chun, BJP leh Narendra Modi nuai ngei ah hin le ding det thei tho ina,” ti'n a gen hi. Lungthim a sukha, sau tak ei ngaitua sak hi.

Ziagual ma chun, Kochuam puitu pakhat A.C. Michael chun, “Tu dinmun ah Khristian te hin, a mi tamdan leh a pankhawm thiamnau apat hatna chang thei a hi lam uh hethiam in mangthiam nailo maleh, a hung matthiam phat tak leh Politics ah hin nanzaw guallo in hattak hung hi di a hui” a ti.

KOCHUAM NUMEI PAWL
VÂIHAWM KIKHAWP 10 VEINA

*A mun : D. Khawzim Kochuam Biak-In,
D. Khawzim Pastor Bial*
A hun : ni 27 February, 2026 – ni 1 March, 2026
Thupi : “Pauchap Thilhitheina” (Est. 4:16)

Rev. S. Lama Vaiphei, Synod Moderator, TPC ah kipat in thagauthupi “Pauchap Thilhitheina” ti ngaithâk a hi. Vâihawm Kikhawphun sung in Rev. C. Lalremruata, Consultant, Rev. Lamgouliau Hatlei i/c D. Khawzim Pastor Bial leh Pi Dimtinniang, Committeemember CKNP te apat in Pathian thu ngaithâk a hi.

Vâihawmna: Ni 28 February, 2026 (Kiginni) sùn in Vâihawmna D. Khawzim Kochuam Biak-In ah nei a hi’n, palâi 139 chiakhawm a hi.

Seminar: Ni 1 March, 2026 (Pathianni); 01:00 p.m. in Pi Hoibetty, Headmistress VK Tawna High ah kipat in “Thianthona” ti thupi kichian tak leh fel tak in ngaithâk a hi.

CENTRAL KHRISTIAN KHANGLAI PAWL

I. BIAL REPORT KHAIKHAWMNA (March 2025 - March 2026)

1. Kisimna

Sl. No.	Kisimna	2024-2025	2025-2026	Punna(+) Kiamna (-)
1	Branch um zat	88	87	-1
2	KKP Member zat			
	Numei zat	2157	2233	+76
	Pawsal zat	2838	2956	+118
	Gawpkhawm	4995	5189	+194
3	Zi/Pawsal nei zat			
	Biak In hawng ah	63	65	+2
	Mundang ah	88	79	-09
4	Thunun ah umlai zat	80	61	-19
5	Mithi (KKP lak a)	6	17	+11
6	Bible zillai zat	13	19	+6

2. Bial KKP nasepna(activities) tângpi

Blood Donation, Branch vethâkna, Bial KKP dang ve, Branch tin ah kikhawpkhawmna, Fellowship, Semtu

chawpna, Pauchapkhawmna, Anngawl Pauchap, zan khawvak ah pauchap, Bible Quiz, Praise & Worship Night, Cultural Night, Choir Night, Musical Night, Solfa Training, Seminar, Biak In hawng ah kichen kipakpina thilpiak, Pastor kichawn dite thâkna thilpiak piakte, Bible châng signboard ah tâkdaw, Bible sim suak, La Puihuaidân training, Literature Drive, Meet, Advent/Advance Christmas, Cleanliness drive te hi Bial KKP nasepna tângpi a hi.

3. Kumpuan[2025-2026] “Ka Pa’u Van ah um” bawzuidân

Kumpuan Thupi, “Ka Pa’u Van ah um” ti hi KKP kikhawpna hun in zil sek a hi. Branch te’n kitûp leh lawk tak in a zil suak thei ah, maleh, gambuai in a sukkhâk Branch khenkhat a zil theilo a um u’i.

4. A hun kibang ah pauchap bawzuidan (Ni 04 August 2025)

Branch in amau lemchangdan chiat in kikhawpna nei te’n zia hun hi mat a hi.

5. KKP Day(21st January) matdân tângpi

Mat theidân dân ah Branch in a mang ah - Sports, Blood Donation, Cleanliness Drive, Kikhawpna ah te leh Thawlawm kuanna te in KKP Day mat a hi. Mangtheilo tamzaw a ki-um nalai hi.

6. Bial KKP sum mudan tângpi

Branch tin in a tuak ding zat Budget siampiak apat te, Conference thawmlawm, Bial huap Programme thawlawm, Bial Standing Committee leh Bial KNP Committee apat te, Fund drive, thaphût, van khel man apat te hi sum muna te a hi. Chun, CKKP Budget Bial zosia in aki pesuak thei a, kipakum akisa’i.

7. KKP Kikhawpdân tângpi

Branch khenkhat in Programme Making/Drafting Committee nei thei in KKP kikhawpna Programme siam sek a hi. Group Night, Kumpuan thuzilna, Sermon, Topical Sermon, Fellowship, Competition kikhawp, Lazilna leh KKP Hand Book in ei ziltîl kikhawpdan te mangcha in kikhawpna programme te guanggal a hi. Gam Buai zia ah a sukkhak Branch te leh Tanggam lam Branch khenkhat kikhawpna ne itheilo a ki um ah, khawk a kisa’i. Khawpi ah um branch te’n lemchangdân in KKP kikhawpna leh Home visit in a nei sek u’i.

8. Report ding ah pawimaw dang

- a) Bial Lapawl te mat di Bluetooth Speaker chaw thei a um hi.
- b) Bial Lapawl Music Video bawl thei a um hi.
- c) Pastor Quarters' van chawkna ding pethei a um hi.
- d) KKP member tawm ziak in haksatna tuak um hiat a hi', da um a kisa'i.
- e) Gal ziak in Branch a sukkhak bangzat a he'm a um nalai ah, malakna a haksatdan thu hiat a hia, khawk a kisa'i.

II. KKP VAIHAWM KIKHAWP 9-VEINA, 2027

A mun : L. Muncham Kochuam Biak In, Dumlian Pastor Bial

A hun : Ni 12-14 March 2027

Thupi : "Ettawn tâk Khanglai" (1 Ti. 4:12)

III. KKP GENERAL CONFERENCE 15-VEINA, 2028

Zintuntu di - S. Munnuam Pastor Bial

IV. KKP GENERAL CONFERENCE 16-VEINA, 2030

Zintuntu di - S. Kawtlian Pastor Bial

V. CKKP [2026-2028]

Office Bearers

Leader : Rev. Siamlalon *i/c Sumtukphai Pastor Bial*

Assistant Leader : Tv. Kevin Goulian, *New Lamka Pastor Bial*

General Secretary : T. Upa Thangginlun, *S. Munnuam Pastor Bial*

Assistant Secretary : Pu Henminlian, *Lamka Pastor Bial*

Treasurer : Pu Lalminlian, *Kangvai Pastor Bial*

Finance Secretary : Pu V. Thangboi, *Gangpimual Pastor Bial*

Committee Member

- | | | |
|------------------------|---|-------------------------|
| 1. Nk. Nengneichong | - | Dongjang Pastor Bial |
| 2. Pu Lunmichael | - | S. Munnuam Pastor Bial |
| 3. Tv. Henry Lamkhohen | - | Dongjang Pastor Bial |
| 4. Tv. Lalzel | - | Dumlian Pastor Bial |
| 5. Tv. Malsawm Vaiphei | - | Kangvai Pastor Bial |
| 6. Tv. T. Kamdinglian | - | D. Phailian Pastor Bial |
| 7. Tv. Kapzangam | - | D. Phailian Pastor Bial |
| 8. Pu T. Moia | - | Gangpimual Pastor Bial |
| 9. Tv. Thangmuanlal | - | Lamka Pastor Bial |
| 10. Pu Kambenjohn | - | Mata Pastor Bial |
| 11. Tv. Gensiamlal | - | Panglian Pastor Bial |
| 12. Tv. Kamzoulian | - | S. Kawtlian Pastor Bial |
| 13. Tv. Paulalsang | - | S. Kawtlian Pastor Bial |
| 14. Tv. Samuel Malsawm | - | S. Munnuam Pastor Bial |